



“Mahasiswa Institusi Pengajian Tinggi (IPT) perlu sama-sama menggalas tanggungjawab memelihara perpaduan rakyat di negara ini,” tegas Naib Canselor UMP, Profesor Dato’ Dr. Daing Nasir Ibrahim semasa menyampaikan ucapan sempena Majlis Pelancaran Sekretariat Rukun Negara (SRN) di Auditorium Perpustakaan UMP Kampus Gambang baru-baru ini.

Profesor Dato’ Dr. Daing Nasir berkata, penubuhan SRN ini akan menggalakkan penyertaan mahasiswa pelbagai kaum dan agama mendokong semangat muhibbah serta perpaduan negara.

“Penghayatan prinsip Rukun Negara dan nilai utama gagasan 1Malaysia di kalangan warga Malaysia perlu diteruskan agar keamanan, keselamatan dan kemakmuran negara dikecapi bersama,” katanya.

Justeru, beliau menaruh harapan agar SRN yang baharu dilancarkan ini benar-benar berfungsi sebagai sebuah organisasi yang menggalakkan penyertaan mahasiswa pelbagai kaum dan agama dalam mendukung semangat muhibbah serta perpaduan negara.

Sementara itu, pelajar Fakulti Sistem Komputer & Kejuruteraan Perisian (FSKPP), Siti Hanisah Majid, 21 berkata, penyertaannya dalam persatuan ini akan dapat mengeratkan lagi perpaduan bangsa di Malaysia.

“Perpaduan merupakan tulang belakang kepada sesebuah negara yang mempunyai pelbagai lapisan masyarakat.

“Mahasiswa sebagai pewaris bangsa perlu berusaha mendidik generasi muda Malaysia hari ini untuk menjadi warga Malaysia berjiwa patriotisme “ katanya.

Hadir sama Timbalan Naib Canselor (Penyelidikan & Inovasi), Profesor Dato’ Dr. Rosli Mohd. Yunus, Penolong Naib Canselor (Hal Ehwal Pelajar & Alumni), Profesor Dr. Yuserrie Zainuddin, Pengarah Dasar & Perancangan, Jabatan Perpaduan Negara & Integrasi Nasional, Kapli Emek dan Pengarah SRN Shrihar a/l Gengatharan.

## UMP tubuh Sekretariat Rukun Negara

